



志

早天府之區動為英雄所蟠踞古稱王跡之興起
 閭巷其信然歟然嘗聞虞夏之興積善累功數十
 湯武之王修仁行義十餘世鼎社飯歸有天然數焉
 未協龍飛安希豹變時幾先而悔事後亦見其惑已
 哲王御宇官府一體警御必殿內無幃屏燕昵之私
 外有公侯腹心之寄以故名器不假而國勢益安自
 唯麟失德江漢風微重權旁落夫天潢威福頻移於
 勲戚土田雖錫難尋帶礪之盟與命重申誰效屏藩
 之誼嗚呼封建多而跋扈頻仍藩鎮強而羣雄割據



豈一朝一夕之故哉其由來有漸已余觀前志所載
自帝系而后妃而世家而藩鎮亦旣賢否並書正邪
兼錄第歷世滋久掛漏尙多爰於公餘網羅散失體
裁雖仍其舊而徵事加倍於前敢云綜覈庶幾考鏡
得失之林於茲有取云爾志世系

正定府志卷之二十七

世系上

帝王
后妃

公主附

帝王

班彪著王命論謂神器有命不可以智力求豈非篤論哉南越王陀於高后時雖妄竊帝號以自娛及文帝使陸賈馳諭卽改號稱臣是尙知守臣節以終者若夫從珂特蓬戶桑樞之子耳明宗卵而翼之寄之腹心委以師旅重任自宜竭股肱之力加之以忠正而乃包藏禍心窺竊神器乘國勢少挫反兵相向卒之踐祚未幾而身死國滅爲天下笑嗚呼何其愚也

史稱劉盆子受符命時敝衣赭汗見衆拜恐怖欲啼
後世傳爲笑談韓林兒殆其流亞歟海內失鹿豪傑
並起而逐之林兒不度德不量力顧以衆人爲擁已
也而欲拱手以享其成功斯亦危已致貴無漸失必
暴受爵非道殃必疾斯二言者洵千秋之龜鑑哉

漢

南越王尉陀者正定人也姓趙氏秦時已并天下略定
揚越置桂林南海象郡以謫徙民與越雜處十三歲
佗秦時用爲南海龍川令至二世時南海尉任囂病
且死召龍川令趙佗語曰聞陳勝等作亂秦爲無道

天下苦之項羽劉季陳勝吳廣等州郡各共興軍聚衆虎爭天下中國擾亂未知所安豪傑畔秦相立南海僻遠吾恐盜兵侵地至此吾欲興兵絕新道自備待諸侯變會病甚且番禺負山險阻南海東西數千里頗有中國人相輔此亦一州之主也可以立國郡中長吏無足與言者故召公告之卽被佗書行南海尉事囂死佗卽移檄告橫浦陽山湟谿關曰盜兵且至急絕道聚兵自守因稍以法誅秦所置長吏以其黨爲假守秦已破滅佗卽擊並桂林象郡自立爲南越武王高帝已定天下爲中國勞苦故釋佗弗誅漢

十一年遣陸賈因立佗爲南越王與剖符通使和集百越毋爲南邊患害與長沙接境高后時有司請禁南越關市鐵器佗曰高帝立我通使物今高后聽讒臣別異蠻夷隔絕器物此必長沙王計也欲倚中國擊滅南越而並王之自爲功也於是佗乃自尊號爲南越武帝發兵攻長沙邊邑敗數縣而去焉高后遣將軍隆慮侯竈往擊之會暑濕士卒大疫兵不能踰嶺歲餘高后崩卽罷兵佗因此以兵威邊財物賂遺閩越西甌駱役屬焉東西萬餘里乃乘黃屋左纁稱制與中國侔及孝文帝元年初鎮撫天下使告諸侯

四夷從代來卽位意喻盛德焉乃爲佗親家在正定
置守已歲時奉祀召其從昆弟尊官厚賜寵之詔丞
相陳平等舉可使南越者平言好時陸賈先帝時習
使南越廼召賈以爲太中大夫往使因讓佗自立爲
帝曾無一介之使報者陸賈至南越王甚恐爲書謝
稱曰蠻夷大長老夫臣佗前日高后臨異南越竊疑
長沙王讒臣又遙聞高后盡誅佗宗族掘燒先人塚
以故自棄犯長沙邊境且南方卑濕蠻夷中間其東
閩越千人衆號稱王其西甌駱裸國亦稱王老臣妄
竊帝號聊以自娛豈敢以聞天王哉乃頓首謝願長

爲藩臣奉貢職於是乃下令國中曰吾聞兩雄不俱立兩賢不並世皇帝賢天子也自今已後去帝制黃屋左纛陸賈還報孝文帝大悅遂至孝景時稱臣使入朝請然南越其居國竊如故號名其使天子稱王朝命如諸侯至建元四年卒

後唐

廢帝姓王氏鎮州平山縣人初名阿三家世微賤母魏氏寡居明宗爲騎將過平山掠其子母養以爲子年十餘歲名曰從珂及長狀貌雄偉謹信寡言明宗甚愛之又與莊宗同年其驍勇善戰亦相類自晉與梁

相拒嘗立奇功同光二年授衛州刺史突騎指揮使
戍於石門聞明宗南還乃引戍兵自曲陽出常山曉
方患兵寡軍聲賴以大振帝卽位拜河中節度使封
潞王居諸子中年最長安重誨慮爲後患欲陰圖之
伺鎮河中閱馬黃龍莊令指揮楊彥溫閉城以拒從
珂聞知乃亟奔虞鄉馳上變明宗疑其事欲親究遣
殿直范溫必生致彥溫重誨固請用兵上不得已遣
侍衛指揮藥彥稠留守索自通率兵以討罷從珂居
清化里重誨又諷宰相馮道言其失守白請行法帝
謂姦人所中事未辨明趙鳳希意言春秋責帥之義

所以勵爲臣者帝曰公等皆非本意明日果自論列
問欲何處置朕當卽從重誨曰此父子之際非臣敢
言惟陛下裁之明宗曰吾爲小校時衣食不足此兒
擔石灰拾馬糞以相養活今貴爲天子乃不欲容之
耶矧方杜門私第何與公事自是始不敢言重誨見
殺起爲左衛大將軍西京留守長興三年轉鳳翔節
度使愍帝立徙北京留守以洋王從璋代之心益自
疑遂據城反清泰元年三月丁巳王舉兵東庚申次
長安西京留守劉遂雍叛降甲子次華州執藥彥稠
丙寅次靈寶河中安彥威陝州康思立皆降己巳賊

州康義誠叛降遂殺宣徽使孟漢瓊愍帝出居衛州
四月壬申入京師馮道率百官迎於蔣橋王辭不見
入臨於西宮始覲羣臣道拜答之內居至德宮癸酉
太后下令降帝爲鄂王命王監國乙亥卽皇帝位丙
子率河南民財及借民房課以賞軍戊寅殺鄂王慈
州刺史宋令詢死之乙酉大赦改元戊子殺康義誠
藥彥稠五月丙午以韓昭 范延光爲樞密使劉延
朗爲副使甲寅賜勸進人宗子官六月庚辰幸范
延光及索自通第七月馮道罷以盧文紀爲中書侍
郎同平章事丁巳立沛國夫人劉氏爲皇后九月契

丹寇邊十月戊寅李愚劉昫罷以姚顗張延朗爲中書侍郎並同平章事十二月契丹寇雲州是歲旱二年春二月甲戌延光罷趙延壽代之己丑追尊母魏氏爲皇太后五月辛卯韓昭罷劉延皓代之六月癸未羣臣獻添都馬七月劉延皓罷房勗代之是歲契丹寇邊三年正月丁未封子重美爲雍王三月丙午以馬胤孫爲中書侍郎同平章事五月契丹助石敬瑭反命張敬達爲太原四面都招討使以討之楊光遠爲副戊申先鋒指揮安審信振武戍將安重榮叛七月癸丑彰聖指搆張萬廸叛俱降敬瑭九月

辰敬達及契丹戰於太原敗績帝遣趙延壽兵二萬屯團柏谷范延壽兵二萬屯遼州以救敬達皆逗留不進戊申自將精騎三萬出次河橋十月壬戌括馬籍民爲兵十一月戊子以盧龍節度趙德鈞爲行營都統將幽州兵萬餘帝親督之知其不救但日酣飲悲歌而已丁酉契丹立敬瑋爲帝國號晉閏月甲子楊光遠安審琦殺張敬達以其軍叛降於契丹甲戌契丹及晉人入潞州丁丑帝還宮辛巳自焚年五十三晉高祖命焚燼骨於徽陵域中

元

僞宋帝韓林兒正定樂城人父山童自其先以白蓮會
燒香惑衆謫徙永平順帝至正初山童倡言天下將
亂彌勒佛下生明王出愚民翕然信之旣而東陽民
張氏婦生子甫歲周暴長四尺許容貌異常鰭腹擁
腫見人嘻笑如俗所畫布袋和尚者時至正九年四
月也於是河南江淮間民騷然欲動黃河南徙帝用
賈魯策鑿求禹故道山童陰作石人一眼埋之當道
鐫其背曰石人一隻眼挑動黃河天下反河丁掘得
之相驚詫潁州妖人劉福通因詭言山童實宋徽宗
八世孫走海外得還當爲中國主我劉光世後合輔

之與其黨杜遵道盛文郁羅文素韓咬兒聚衆於白
鹿莊刑黑牛白馬誓告天地謀爲亂縣官聞而捕之
十一年辛卯五月福通遂起兵以紅巾爲號官兵捕
之急山童被禽其妻楊氏及子林兒逃匿武安山時
蕭縣人李二號芝蔴李亦以燒香聚衆與其黨趙均
用彭早住攻陷徐州惟福通黨尤盛不可制不數月
拔潁州據朱臯破羅山上蔡真陽確山舞陽葉縣及
汝寧光息等州衆至十萬朝廷患之丞相脫脫請以
其弟御史大夫也先帖木兒帥諸衛大軍往討復上
蔡禽韓咬兒送大都誅之明年帝命脫脫親征徐州

李二敗死早住均用走濠州互爭雄長未幾早住中

流矢死均用尋依福通兵勢益振十五年福通自礪

山夾河求得林兒立爲帝又號小明王都亳州僞號

宋改元龍鳳其母楊氏稱皇太后遵道文郁稱丞相

福通與文素稱平章拆鹿邑太清宮材建宮闕

其詔有云

韞玉璽於海東取精兵於日本虎賁三千

直抵幽燕之地龍飛九五重開大宋之天

遵道得寵

專威福福通使甲士搗殺之自爲丞相稱太保會滁

陽郭子興卒林兒招其諸將授子興子爲元帥朱元

璋

卽明太祖

張大祐爲副元帥皆奉龍鳳紀年

後子興子及天祐渡

江與元兵戰皆敗死詔河南平章答失拔都魯統兵討之與福

通戰於長葛敗績退走中牟會同知樞密院事劉
刺不花來援福通少却答失乃整兵復敗福通於太
康進圍亳林兒走安豐明年僞宋將李武崔德破潼
關入陝虢拔其城義兵元帥察罕帖木兒引兵至武
等望其炊烟畏兵衆不敢逼還掠安邑察罕追感至
下陽衆遁去十七年僞宋將毛貴陷膠州王士誠據
山東李武崔德破商州攻武關徑趨長安三輔震動
察罕提兵入潼關大敗之乃還毛貴破萊州益都般
陽諸路擁衆圍濟南時董搏霄爲山東宣慰使以兵
救濟南敗貴於城下大挫其鋒未幾義兵萬戶田豐